

菩薩摩訶薩欲遍知佛十力當習般若波羅蜜

「大智度論」集粹之廿三

智 銘

從六波羅蜜至三無漏根，皆言應具足。而佛十力，菩薩僅當知，當習行般若波羅蜜者，蓋聲聞法有量有限，故言應具足，自此以下，是諸佛法，甚深無量，菩薩未得，故言欲得是事，當學般若波羅蜜。又聲聞法易解易知，故言具足，菩薩法、佛法難解難知，故言當學。又聲聞法總相，但知苦、知苦因、知苦盡、知盡苦道。聲聞人如小醫，不能徧知病因、病瘥、瘥病藥。菩薩摩訶薩如大醫，無病不知，無藥不識，以是故，聲聞法應具足，菩薩法當學。

佛十力者，是處不是處如實知，一力也。知衆生過去、未來、現在諸業、諸受，知造業處，知因緣，知果報，二力也。知諸禪、解脫、三昧、定，垢、淨分別相如實知，三力也。知他衆生諸根上下相如實知，四力也。知他衆生種種欲，五力也。知世間種種無欲性，六力也。知一切道至處相，七力也。知種種宿命，共相共因緣，一世二世乃至百千世劫，初劫盡，我在彼衆生中，如是姓名、飲食、苦樂、壽命長短，彼中死、是間生，是間死還生是間，此間生名姓、飲食、苦樂、壽命長短亦如是，八力也。佛天眼淨，過諸天人眼，見衆生死時生時，端正醜陋，若大若小，若墮惡道，若墮善道，如是業因緣受報：是諸衆生惡身業成就，惡口業成就，惡意業成就，謗毀聖人，邪見、邪見業成就，是因緣故，身壞死時入惡道，生地獄中；是諸衆生善身業成就，善口業成就，善意業成就，不謗聖人，正見、正見業成就，是因緣故，身壞死時入善道，生天上，九力也。佛諸漏盡故，無漏心解脫，無漏智慧解脫，現在法中自識知：我生已盡，持戒已作，後有盡，如實知，十力也。

以上十力，聲聞、辟支佛所不能得，若聞是十力功德，作是念：佛有如是大功德，自慶言：我等善利，蒙益不少，得信心清淨，入盡苦道。諸菩薩者聞之，勤修菩薩道，當得如是十力等大功德果。聲聞人及菩薩，修念佛三昧，非但念佛身，當念佛種種功德法身。應作是念：佛一切種、一切法能解脫，名一切智人。一切法如實善分別說故，名一切見人。一切法現前知故，名一切知見無礙人。等心一切衆生故，名大慈悲人，有大慈悲故，名爲

世救。如實道來故，名爲如來。應受一切世間供養故，名爲應供人。成就不顛倒智慧故，名正徧知。戒、定、智慧成就故，名明行足。不復還故，名善逝。知世間總相別相故，名世間解。善說出世間安隱道故，名無上調御師。以三種教法度衆生故，名天人師。一切世間煩惱種，能自覺亦能覺人故，名爲覺人。一切行願具足故，名有德。十力成就故，名堅誓。得四無畏故，名人師子。得無量甚深智故，名大功德海。一切記說無礙故，名如風，一切好醜無憎愛故，名如地。一切結使薪故，名如火。善漸一切煩惱習故，名具足解脫。最上住處故，名爲世尊。佛有如是等功德故，應念佛。以是故，菩薩摩訶薩欲得佛十力，當學般若波羅蜜。

諸菩薩修菩薩道，苦行事，難辦難成，故欲懈怠。是故佛言：行是十力，當得無量果報。汝等慎勿疲倦，精勤努力，修菩薩道，行是十力。諸佛有無量力，度人因緣故，僅說十力，足成辦事：以是處不是處智力，分別籌量衆生，是可度是不可度。以業報智力，分別籌量是人業障，是人報障，是人無障。以禪定解脫三昧智力，分別籌量是人著味，是人著味。以上下根智力，分別籌量衆生智力多少。以種種欲智力，分別籌量衆生所樂。以種種性智力，分別籌量衆生深心所趣。以一切至處道智力，分別籌量衆生解脫門。以宿命智力，分別籌量衆生先所從來。以生死智力，分別籌量衆生處好醜。以漏盡智力，分別籌量衆生得涅槃。佛用是十力度脫衆生，審諦不錯，皆得具足，以是故，佛雖有無量力，但說此十力。

復次，是處不是處力，定知從是因緣出是果報，是中總攝九力：爲欲度衆生故，於初力中分別有九種。何以故？是世間衆生，現前見穀從種出而不能知，何況心心數法因緣果報？佛於內外因緣果報了了徧知，故名爲力。佛知是衆生業煩惱因緣故繫，淨禪定三昧解脫因緣故解。是一切衆生三世三種諸業、諸煩惱，輕重、深淺、粗細，佛悉徧知故名力。一切衆生諸禪定解脫三昧，大小、深淺解脫因緣，佛悉徧知故名力。衆生鈍根爲後身故作罪福業因緣；利根人爲不生故集諸業，佛悉知此上下根好醜相故名

力。知一切衆生二種欲，作上下根因緣，二種欲善惡種種別異，佛悉徧知故名力。二種欲由二種性因緣故，徧知衆生深心所趣故名力。一切衆生種種性因緣故行二種道，所謂善道、惡道，種種門所至處，佛悉徧知故名力。過去未來世中因緣果報，智慧無礙，是名宿命生死智力。知過去未來因果已，悉知方便壞因緣果報相續，是名漏盡力，佛知三世中二種因緣，分別籌量衆生根欲性，爲漏盡故說法，是漏盡力。

是處不是處力者：乃佛知一切諸法因緣果報定相，從是因緣生如是果報，從是因緣不生如是果報。所以者何？如多性經中說是處不是處相：惡業得受樂報無是處，惡業當不能得世間樂，何況出世樂？若惡行生天無是處，惡行當不能得生天，何況涅槃？五蓋覆心散亂，離修七覺而得涅槃無是處；五蓋覆心離修七覺，尚不能得聲聞道，何況佛道？心無覆蓋，佛道可得，何況聲聞道？如是等是處不是處，多性經中，佛自口說。諸論議師輩，依是佛語，廣說是處不是處；若言佛有闕失罪過，若諸賢聖求外道師，若諸賢聖自言我是佛，若諸賢聖墮惡道，若見諦所斷結更生，若諸賢聖覆藏罪，若須陀洹二十五有，皆無是處。輕說法者，輕法自輕，破戒愚癡，若言得具足善法，無是處。自言我是佛，此身口惡不悔欲見佛；若破僧罪不悔欲見佛；邪定入正定，正定入邪定，正定入不定；除佛法別有真得道人，應得道身若死，皆無是處。除因緣生識，出名色更有法，無是處，入慈三昧，若他因緣死；入滅盡定，在見諦道中若死，皆無是處。有爲常，涅槃無常，凡夫人能斷非有想非無想結使，一切取相禪定中修聖道，無漏道有漏因；若地濕相，水堅相，火冷相，風住相，皆無是處。無明不能生諸行，乃至生不能生老死，無有是處。二心一時生：五識象能分別取相，若着、若離；能起身業、口業，若眠、若入禪定，無有是處。但五識相續生，不生意識；但五識象中著有相續；但五識象能緣名，能緣相，能緣無色法，能緣過去、未來，能緣離三世法；但五識象中有憎觸、明觸、修禪定，若受善律儀、不善律儀，若憂喜；若有無覺無觀；若增益諸根，皆無是處。鼻識、舌識，有隱沒無記；凡夫人第六識離我行，無是處。如是等

無量無是處。是處亦如是。佛知是處無是處，分別籌量可度者爲說法，不可度者爲作因緣。如首羅應度而不度，如舍利弗所不度者是。佛無是事，無能壞，無能勝，悉徧知故，是初力。

業報智力者：身口所作業，及此生無作業，所受戒業亦惡業，日夜隨生業，用生罪福業，是業佛畧說三處攝，是名一切業用。佛知一切衆生有業過去，報亦過去；有業過去，報在現在；有業過去，報在未來；有業過去，報在過去、現在；有業過去，報在過去、未來；有業過去，報在現在、未來；有業過去，報在過去、未來、現在。現在業亦如是。善心中受善、不善、無記業報；不善心、無記心亦如是。樂業因緣故受樂報，苦業因緣故受苦報，不苦不樂業因緣故受不苦不樂報。現報業因緣故受現報，生報業因緣故受生報，後報業因緣故受後報。不淨業因緣故受惱報。淨業因緣故受無惱報，雜業因緣故受雜報。二種業：必受報業，不必受報業。必受報業，不可得離。或待時、待人、待處受報。必受業報，不待技能功勳，若醜若好，不求自來，不待因緣，此業重故。欲界受三種業報處：樂受業、苦受業、不苦不樂受業。色界受二種業報處：樂受業、不苦不樂受業。無色界受一種業報處：不苦不樂受業。或待事者，依是事得受業報。佛知一切衆生造諸業處，或欲界、色界、無色界。欲界在何道中，若天道在何天中，若人中在何天下，若閻浮提在何國，若是國在何城、何聚落，若是城在何里、何巷、何舍、在何處，知是業何時作，過去一世、二世乃至百千萬世。是業果報幾已受、幾未受、幾必受、幾不必受。知善不善所用事物：所謂刀杖、殺救殺等、自殺、遣人殺，諸餘惡業亦如是。善業亦如是。知如是布施、持戒修善。施中所施何等土地、房舍、衣服、飲食、醫藥、臥具、七寶財物。戒中受戒，自然戒，心生戒，口言戒，一行戒，少分戒，多分戒，滿分戒，一日戒，七善道戒，十戒，具足戒，定共戒。善福中修初禪，二、三、四禪；慈心，悲、喜、捨心。如是等種種業因緣。若慳貪，若瞋恚，若怖畏，若邪見，若惡知識等，種種惡業因緣。福業因緣，若信，若憐愍，若恭敬，若禪定，若智慧，若善知識等，種種善業因緣。是諸業自在，一切天及人，是諸

業相無能轉者，於億千萬世常隨逐衆生不捨，如債主隨人；得因緣具足，便與果報。如地中種子，得因緣時節和合便生。是業能令衆生六道中受生，駛疾如箭。一切衆生皆有諸業報分，是業果報時到，不可遮止，如劫盡火。隨衆生應生處，處處安置。人命終時，是業來蔭覆其心，如大山映物。若人以正行御業，善法收養，則與好報，若以邪行御業，不善收養，則與惡報。如是等分別諸業相果報。佛悉知是業及業報，智慧勢力無礙無盡，無能壞，無能勝，是名第二力。

禪定、解脫、三昧、淨垢、分別智力者：禪名四禪，佛知是禪佐助道法，名相、義分，次第薰修，有漏、無漏，學、無學，淨、垢，味、不味，深淺分別等。八解脫，如禪中分別相。說禪攝一切色界定，說解脫攝一切定。禪波羅蜜即是諸解脫。禪、定、解脫、三昧，皆名爲定，定名爲心不散亂。垢名愛見慢等諸煩惱；淨名禪定，不雜愛見慢等諸煩惱。分別名諸定中有一心行，不一心行，常行，不常行，難入、易入、難出、易出，別取相、總取相、轉治、不轉治。轉治者，如淫欲中慈心，瞋人不淨觀，愚癡思惟邊無邊。掉戲心中用智慧分別諸法，沒心中欲攝心。若不爾者，名不轉治。是定中應分別時及住處：若身瘦羸，是非行定時，如菩薩若行時作是念：我今不能生禪定，若多人處，亦非定處。佛知是禪定爲失故，是禪爲住故，是禪爲增益故，是禪爲達到涅槃故。佛知是人難入定，易入易出，易入難出，難入易出。佛知是人應得如是禪，知是人失禪受五欲，知是人受是五欲已還得禪，依是禪得阿羅漢。如是等一切諸禪定解脫，即是三昧。是禪定佛以甚深智慧盡知，無能壞，無能勝，是名第三力。

知衆生上下根智力者：佛知衆生是利根、鈍根、中根。利智名爲上，鈍智名爲下，佛用是上下根智力，分別一切衆生是利根、是中根、是鈍根。是人如是根，今世但能得初果，更不能得餘；是人但能得第二、第三、第四果。是人但能得初禪，是人但能得第二、第三、第四禪，乃至滅盡定亦如是。是人當作時解脫證，是人當作不時解脫證。是人能得於聲聞中第一，是人能得於辟支佛中第一，是人具足六波羅蜜，能得阿耨多羅三藐三菩提。如

是知己，或爲畧說得度，或爲廣說得度，或爲畧說廣說得度。或以軟語故，或以苦語故，或以軟苦語故。佛亦分別是人其餘根，應令增生信根，是人應令生精進、念、定、慧根。是人用信根入正位，是人用慧根入正位。是人利根，爲結使所遮。是人利根，不爲結使所遮。知根雖鈍而無遮。有根鈍而遮者。知是人見諦所斷根鈍，思惟所斷根利；思惟所斷鈍，見諦所斷利；是人一切根同鈍同利；是人一切根不同鈍不同利，是人先因力大，是人今緣力大，是人欲縛而得解，是人欲解而得縛。如是等一切衆生上下根相，皆悉徧知，無能壞，無能勝，是名第四力。

知衆生種種欲智力者：欲名信喜好樂。好五欲，好名聞，好世間財利，好出家，好信，好持戒，好施，好頭陀遠離，好坐禪，好智慧，好多聞，好知毗尼，如是各各有所好。佛知是人多欲、多瞋、多癡。知如是相已，多淫欲人不淨法門治，多瞋人慈心法門治，多愚癡人因緣法門治。如是隨所欲說法，所謂善欲隨心爲說，如船順流；惡欲以苦切語教，如以梢出梢。是欲智中，佛悉徧知，無能壞，無能勝，是名第五力。

性智力者：佛知世間種種別異性，性名積習，相從性生，欲隨性作行；或時從欲爲性，習欲成性。性名染心爲事，欲名隨緣起，是爲欲、性分別。世間種種別異者，各各性，多性，無量不可數，是名世間別異。有二種世間：世界世間，衆生世間，此中但說衆生世間。佛知衆生如是性，如是欲，從是處來，成就善根、不善根，可度、不可度，定，不定，必、不必，行何行，生何處，去何地。佛知是衆生種種性相，所謂隨所趣向，如是偏多，如是貴，如是染心事，如是欲，如是業，如是行，如是煩惱，如是禮法，如是定，如是威儀，如是知，如是見，如是憶想分別；爾所結使生，爾所結使未生。隨所着生欲，隨欲染心，隨染心趣向，隨趣向貴重，隨貴重常覺觀，隨覺觀爲戲論，隨戲論常念，隨念發行，隨發行作業，隨作業果報。佛用是種種性智力，知是衆生可度，是不可度，是今世可度，是後世可度；是即時可度，是異時可度，是現前可度，是眼不見可度；是人佛能度，是人聲聞能度，是人共可度；是人必可度，是人必不可度；是人畧說可

度，是人廣說可度，是人畧廣說可度；是人讚嘆可度，是人折伏可度，是人將迥可度，是人棄捨可度，是人細法可度，是人粗法可度；是人苦切可度，是人軟語可度，是人苦軟可度。是邪見、是正見；是著過去，是著未來，是著斷滅法，是著常，是著有見，是著無見；是欲生，是厭生；是求富貴樂，是著厚邪見；是說無因無緣，是說邪因緣，是說正因緣，是說無作業，是說邪作業，是說正作業；是說不求，是說邪求，是說正求；是多行愛，是多行見；是好信，是好慧；是貴持戒，是貴禪定，是貴智慧；是易出易拔，是難出難拔；是多欲，是多瞋，是多癡；是薄煩惱，是厚煩惱。佛知是欲界衆生，是色界、無色界衆生；是地獄、畜生、餓鬼、人、天；是卵生、胎生、濕生、化生；是有色，是無色，是有想、是無想；是短命、是長命；是但凡人未離欲，是凡夫人離下地欲，未離禪欲；如是乃至非有想非無想；是向道、是得果，是辟支佛，是諸佛。如是等種種分別五道、四生，三聚、假名，障、象、入、界，善根，不善根，諸結使、地，業果，是可度、是不可度，滅智分別。以如是等分別，知世間種種別異性，得無礙解脫。如是等種種別異，佛悉徧知，無能壞，無能勝，是名第六力。

一切至處道智力者：有人言：業即是道，所以者何？業因緣故，徧行五道。有業能斷，業能有所至，所謂三聖道分及無漏思。是故，諸業是一切至處道。有人言：五分、五智、三昧住，一切處利益事辦。有人言：第四禪即是，何以故？第四禪一切諸定至處。如諸經中說：是善心、定心、不亂心、攝心，皆入第四禪。有人言：如身念處即是至處道，是諸道利益之本。復有言：一切聖道是，用是聖道，得隨意利益。復有論者言：一切善道，一切惡道，一切聖道，各各知諸道至處，如毛豎經中說。佛悉徧知，無能壞，無能勝，是名第七力。

宿命智力者：宿命有三種：有通、有明、有力。凡夫人但有通，聲聞人亦通亦明，佛亦通、亦明、亦力。所以者何？凡夫人但知宿命所經，不知業因緣相續；以是故，凡夫人但有通，無有明。聲聞人知集諦故，了了知業因緣相續生，以是故，聲聞人亦

有通、亦有明。若佛弟子，先凡夫人時得宿命智，入見諦道中知集因緣，第八無漏心得斷見故，故通變爲明。所以者何？明名見根本，若佛弟子先見聖道，後宿命智生，亦知集因緣力，故通變爲明。佛用是明，知己身及衆生，無量無邊世中，宿命因緣所更，種種悉徧知，是爲力。無能壞，無能勝，是名第八力。

生死智力者：佛用天眼，見衆生生死處。凡夫人用是天眼，極多見四天下；聲聞人極多傍見小千世界，上下亦徧見。辟支佛見百千世界，諸佛見無量無邊諸世界。凡夫人天眼智，是通而非明，亦如是，但見所有事，不能見隨業因緣受生。聲聞人所住於三昧中得天眼，即所住之三昧中能見；若有覺有觀三昧，若無覺有觀三昧，若無覺無觀三昧；佛隨所入三昧中住，欲見盡見；若依無覺無觀三昧中得天眼，入有覺有觀三昧，若無覺有觀三昧中亦能見。佛心雖入餘三昧，天眼不滅。是智慧徧知一切衆生生死所趣，無能壞，無能勝，是名第九力。

漏盡智力者：九力智慧分別有差別，漏盡雖同，但智慧分別大差別。聲聞極大力，思惟所斷結，生分、住分、滅分，三時斷。佛則不爾，一生分時盡斷。聲聞人見諦所斷結使，生時斷；思惟所斷，三時滅。佛則見諦所斷，思惟所斷，無異。聲聞人初入聖道時，入時與達時異；佛則一心中亦入亦達，一心中得一切智，一心中壞一切障，一心中得一切佛法。諸聲聞人有二種解脫：煩惱解脫，法障解脫。佛有一切煩惱解脫，亦有一切法障解脫。佛自然得智慧，諸聲聞人隨教道行得。聲聞人但自知盡漏，諸佛自知盡漏，亦知盡他人漏。佛獨知衆生心中分別有九十八使，一百九十六纏，除佛無有知者。佛亦獨知苦法智，苦比智中，斷爾所結使性，乃至道比智亦如是；思惟所斷，九解脫道中亦爾。佛悉徧知一切衆生如是事，聲聞若少知少說，皆隨佛語。如是漏盡智慧力勢，無能壞，無能勝，是名第十力。

是十力，各各於自事中大。是十力皆以無礙解脫爲根本，無礙解脫爲增上。佛雖無我、我所着，有無量力，大悲爲度衆生故，但說十力，不爲自讚。佛功德深遠，若佛不自說，無有知者，爲衆生所說，所益甚多。以是故，佛自說是十力。復次，有可度

者，必應爲說，所應說中，次第應說十力，若不說，彼不得度，是故自說。不自念爲有名稱故，自說功德。佛清淨語言說法，光明破衆生愚闇，自然有大名稱。以是故，佛自說十力等諸大功德無有失。力名能有所辦，用是十力增益智慧故，能破論議師；用是十種力增益智慧故，能好說法；用是十種力增益智慧故，能摧伏不順；用是十種力增益智慧故，於諸法中得自在。是爲以聲聞法畧說十力義，菩薩摩訶薩欲徧知佛十力，當習行般若波羅蜜。

（上接第22頁「佛學研究方法論」序）

看，這種新方向是可喜的發展，因爲佛教畢竟是一種宗教，它與其他宗教所面對的，有不少是共同的問題。即使佛教與其他傳統之間並無平行的或歷史的關聯，比較性的探討依然常給佛學研究帶來重大的成果。總之，宗教與宗教之間固然有許多差別，可是它們總有不少相通的地方。

宗教學術的研究通常將學科的進路分成幾類，如：宗教哲學、文獻學、宗教史、宗教心理學等。這樣的分類大致上可以應用於大部份的宗教上面，佛教也不例外。換言之，我們很容易就能將佛學研究的種種作品劃入這些類別之中。事實上，這些方法只是從存在已久的傳統學問中發展出來的科學的成果。除此之外，社會科學對宗教研究也有新的增益。宗教社會學和宗教人類學就是這些新發展的最佳例證。人們也許會認爲這些新興的社會科學與佛教這樣古老的傳統並不相干。但是，從社會科學的角度去研究佛教——尤其是亞洲的南傳佛教——的結果，處處證明這些進路對我們認識和理解佛教，都有新的啓發。傳統的和科學的研究經驗之結合，豐富了我們的知識，加深了我們的理解，促進了我們的研究技巧。佛學研究的科學的發展，雖然已超出本書的範圍和目的，但是這個方向的發展肯定會在全體宗教研究中特別是佛學研究裏，佔有基要的地位。從事佛學研究的學者們討論到佛學研究的方法論時，實在不容忽視這些重要的新發展。幾年以後，當有更多同類的作品出版，以及本書增訂再版的時候，希望佛學之科學研究的成績會成爲書中的一部份。